

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA
GRADSKO VIJEĆE

Broj: 01-45-3352/21

**Z A P I S N I K
SA ŠESTE SJEDNICE
GRADSKOG VIJEĆA ZENICA**

- održane 04. februara 2021. godine -

Zenica, februar 2021. godine

**Zapisnik sa 6. sjednice Gradskog vijeća Zenica,
održane 04.02.2021. godine**

Sjednica je počela s radom u 10.09 sati.

Sjednicom je predsjedavao Almir Babajić, predsjedavajući Gradskog vijeća Zenica.

Nakon uvodnog pozdrava, predsjedavajući Vijeća, konstatovao je da 6. sjednici Gradskog vijeća prisustvuje 27 vijećnika, te da Vijeće može punovažno odlučivati. Odsustvo sa današnje sjednice najavili su vijećnici Emina Tufekčić, Šerif Patković, Osman Šuvalić i Edisej Sjerotanović.

Predsjedavajući Vijeća pročitao je Prijedlog Dnevnog reda za 6. sjednicu Gradskog vijeća Zenica kako slijedi:

1. Zapisnik sa 5. sjednice Gradskog vijeća Zenica, održane dana 28.01.2021. godine
2. Vijećnička pitanja i inicijative
3. a) Nacrt Budžeta Grada Zenica za 2021. godinu sa obrazloženjem
b) Nacrt Odluke o izvršavanju Budžeta Grada Zenica za 2021. godinu sa obrazloženjem
4. a) Izvještaj o realizaciji Programa utroška sredstava Fonda za ekologiju za 2020. godinu
b) Program utroška sredstava iz Fonda za ekologiju za 2021. godinu
5. a) Prijedlog Odluke o promjeni oblika i površine parcele u Poslovnoj zoni Zenica I
b) Prijedlog Odluke o raspisivanju javnog konkursa i prodaji gradskog građevinskog zemljišta u Poslovnoj zoni Zenica I
6. Prijedlog Rješenja o imenovanju drugostepene komisije za rješavanje po žalbi protiv rješenja u prvostepenom upravnom postupku

Za današnju sjednicu Gradskog vijeća Klub vijećnika SDA podnio je 2 prijedloga za dopunu prijedloga dnevnog reda: 1. Prijedlog Zaključka o dostavljanju Programa rada Gradonačelnika za mandatni period 2020.-2024. godine i 2. Prijedlog Odluke o subvencioniranju troškova grijanja za sezonu 2020/2021. godina. Radno predsjedništvo je zakazalo sjednicu na kojoj su navedeni prijedlozi razmotreni. Prvi prijedlog je prihvaćen, a o drugom prijedlogu Radno predsjedništvo je zauzelo stav sa obrazloženjem koji je dostavljen svim vijećnicima.

Prije izjašnjavanja o prijedlogu dnevnog reda predsjedavajući Vijeća zatražio je da se Vijeće izjasni o prijedlogu Kluba vijećnika SDA za dopunu prijedloga dnevnog reda koji je prihvaćen: Prijedlog Zaključka o dostavljanju Programa rada Gradonačelnika za mandatni period 2020.-2024. godine, uz napomenu da neće čitati obrazloženje vezano za drugi prijedlog za dopunu prijedloga dnevnog reda jer je isto već dostavljeno vijećnicima. Vijećnici su sa 27 glasova „ZA“, bez glasova „PROTIV“ i bez glasova „UZDRŽAN“ usvojili navedeni prijedlog za dopunu prijedloga dnevnog reda.

Predsjedavajući Vijeća pročitao je zatim konačan prijedlog dnevnog reda za 6. sjednicu:

1. Zapisnik sa 5. sjednice Gradskog vijeća Zenica, održane dana 28.01.2021. godine
2. Vijećnička pitanja i inicijative
3. a) Nacrt Budžeta Grada Zenica za 2021. godinu sa obrazloženjem
b) Nacrt Odluke o izvršavanju Budžeta Grada Zenica za 2021. godinu sa obrazloženjem
4. a) Izvještaj o realizaciji Programa utroška sredstava Fonda za ekologiju za 2020. godinu
b) Program utroška sredstava iz Fonda za ekologiju za 2021. godinu
5. a) Prijedlog Odluke o promjeni oblika i površine parcele u Poslovnoj zoni Zenica I
b) Prijedlog Odluke o raspisivanju javnog konkursa i prodaji gradskog građevinskog zemljišta u Poslovnoj zoni Zenica I
6. Prijedlog Rješenja o imenovanju drugostepene komisije za rješavanje po žalbi protiv rješenja u prvostepenom upravnom postupku

7. Prijedlog Zaključka o dostavljanju Programa rada Gradonačelnika za mandatni period 2020.-2024. godine

Na zahtjev predsjedavajućeg Vijeća vijećnici su se izjasnili o pročitanoj prijedlogu dnevnog reda i isti usvojili sa 27 glasova „ZA“, bez glasova „PROTIV“ i bez glasova „UZDRŽAN“.

TAČKA PRVA

- Zapisnik sa 5. sjednice Gradskog vijeća Zenica održane 28.01.2021. godine

Vijećnici su prihvatili primjedbu vijećnika Faruka Hodžića da se u Zapisniku sa 5. sjednice Vijeća navede inicijativa istog vijećnika za izgradnju dječjeg igrališta u naselju Crkvice, podnesena na 5. sjednici, a zatim sa 27 glasova „ZA“, bez glasova „PROTIV“ i bez glasova „UZDRŽAN“ usvojili zapisnik s navedenom primjedbom.

TAČKA DRUGA

- Vijećnička pitanja i inicijative

Vijećnička pitanja postavili su i vijećničke inicijative podnijeli vijećnici:

Rusmir Isak, Elvis Alijagić, Nermin Mehić, Namir Škaljo, Albin Čatić, Zelda Dizdarević, Ibrahim Šišić, Malik Ejubović, Faruk Hodžić, Kenan Alispahić, Vernes Menzilović, Mirzet Skopljak, Adnan Šut, Elvir Purić, Mahdi Alić, Ekrem Tuka i Elmin Šabanović.

Vijećnik Rusmir Isak postavio je vijećničko pitanje: „Šta je gradska administracija pripremila za upošljavanje mladih kadrova u cilju sprečavanja njihovog odlaska u inostranstvo? Šta se planira poduzeti u cilju sprečavanja odlaska mladih ljudi u inostranstvo posebno kada su u pitanju visokoobrazovani kadrovi?“.

Vijećnik Elvis Alijagić podnio je dvije vijećničke inicijative: 1. za rekonstrukciju poligona za obuku vozača i polaganje vozačkih ispita i 2. za organizaciju i formiranje jedinstvenog šaltera u Šalter Sali Gradske uprave Zenica namijenjenog isključivo slijepim i slabovidnim licima kao i licima sa umanjenim tjelesnim sposobnostima.

Vijećnik Nermin Mehić postavio je pitanje iz nadležnosti MUP-a ZDK vezano za bezbjednosnu situaciju u gradu Zenica s obzirom na priliv i tranzit migranata. Također, podnio je inicijativu za proširenje parking prostora ispred zgrade u ulici Crkvice broj 26.

Vijećnik Namir Škaljo postavio je sljedeće pitanje: „Da li se u ovoj godini očekuje početak izgradnje fekalne kanalizacije na Mošćanici?“. Podnio je i inicijativu za izgradnju sportskog igrališta pored OŠ „Musa Ćazim Ćatić“ u naselju Blatuša u saradnji s Ministarstvom za obrazovanje, nauku, kulturu i sport ZDK. Gradonačelnik je usmeno odgovorio vijećniku Namiru Škalji na podnesenu inicijativu i pojasnio da je izgradnja pomenutog igrališta u nadležnosti navedenog ministarstva. Istakao je da je i rekonstrukcija poligona u nadležnosti Kantona. Vijećnik Albin Čatić podnio je dvije inicijative: 1. za izmjenu Odluke o zagrijavanju stambenog i poslovnog prostora grada Zenice daljinskim grijanjem s prijedlogom da JP Grijanje preuzme obavezu održavanja vrelovodne mreže do šahta ili do zapornog ventila u individualnim stambenim objektima i 2. uvrštavanje u budžet stavke izgradnja kanalizacionog sistema kompletnog sliva Babine rijeke. Vijećnica Zelda Dizdarević postavila je vijećničko pitanje Gradonačelniku vezano za tender za proširenje i izgradnju javne rasvjete, u kojoj je fazi i koja područja potpadaju pod isti. Gradonačelnik je odgovorio da je u toku žalbeni postupak, a da je od predsjednika svih mjesnih zajednica zatraženo da dostave prijedloge svih ulica koje treba osvijetliti. Vijećnik Ibrahim Šišić podnio je dvije inicijative 1. da se kod izrade Programa rada GV planira tačka Izvještaj o stanju vodovodne i kanalizacione mreže na cijelom području grada Zenica i 2. da se kod izrade Programa rada GV planira tačka Izvještaj o realizaciji vijećničkih pitanja i inicijativa. Vijećnik Malik Ejubović podnio je inicijativu za izmjenu Odluke o utvrđivanju kriterija za

dodjelu novčane pomoći za svako novorođenče na području grada Zenica, vijećnik Faruk Hodžić je podnio 2 inicijative: 1. da se izvrši inspekcija kompletnog naselja Crkvice, odrede rizična mjesta za prelazak pješaka i postave usporivači saobraćaja posebno u ul. Čurukovića put i dio ulice od Studentskog doma prema šetalištu 2. da se razmotri mogućnost za izradu projekta Doma za mlade u Crkvicama koji bi bio smješten u objektu nekadašnjeg dječjeg obdaništa. Vijećnik Kenan Alispahić zamolio je službe i preduzeća za finansijsku pomoć Beganović Ameru u finansiranju troškova zoovrta na Smetovima. Drugi dio pitanja istog vijećnika glasio je: „Ima li Grad Zenica institut „bijelog hljeba“ nakon isteka radnog angažmana?“. Vijećnik Vernes Menzilović podnio je inicijativu za promjenu naziva dijela ulice Ahmeta Hafizovića, MZ „Donja Gračanica“ u ul. Mehmeda Kadrića, također predložio je da se održi sastanak između prevozničkih firmi, Gradske uprave i vijećnika radi rješavanja problema saobraćanja određenih linija, jer kako je kazao kompanija Prevoz putnika Zavidovići ukinula je određene linije koje su saobraćale u 10 i 17 h. Vijećnik Skopljak Mirzet podnio je inicijativu za rješavanje prioriteta u MZ „Lokvine“. Vijećnik Elvir Purić ponovio je vijećničko pitanje s treće sjednice i zatražio da se isto uputi JP Autoceste F BiH kako bi preduzeće urgiralo kod izvođača radova da izvrši osiguranje radilišta na petlji u Blatuši, 2. pitanje postavio je Elektro distribuciji vezano za probleme napajanja električnom energijom u naseljima Babići i Rajčevići „MZ Orahovica“, vijećnik Adnan Šut postavio je pitanje vezano za rad Kamenoloma Stijene Jatta, vijećnik Mahdi Alić podnio je inicijativu za izmjenu i dopunu Pravilnika o dodjeli jednokratne pomoći za svako novorođeno dijete na području Grada Zenica, te inicijativu za uklanjanje obilježenih i neobilježenih parking mjesta uz pješačke prelaze. Vijećnik Ekrem Tuka podnio je inicijativu za uspostavljanje Kancelarije za pružanje besplatne pravne pomoći svim žrtvama nasilja, vijećnik Elmin Šabanović postavio je vijećničko pitanje. „Kada će biti uređenje i asfaltiranje ul. Milivoja Čekade od broja 28 do broja 16“, te podnio inicijativu za postavljanje tri saobraćajna ogradala na području MZ „Lašva“.

Napomena: Vijećnička pitanja i inicijative podneseni u pisanoj formi prosljeđuju se nadležnim gradskim službama i drugim subjektima putem dostavnih akata Stručne službe Gradskog vijeća, radi vjerodostojnosti postavljenog vijećničkog pitanja, odnosno podnesene inicijative.

TAČKA TREĆA

a) Nacrt Budžeta Grada Zenica za 2021. godinu sa obrazloženjem

b) Nacrt Odluke o izvršavanju Budžeta Grada Zenica za 2021. godinu sa obrazloženjem

Uvodne napomene za ovu tačku dnevnog reda dali su Fatima Vojvodić, pomoćnica gradonačelnika za finansije i Fuad Kasumović, gradonačelnik.

Izveštaj Komisije za ekonomske odnose podnio je vijećnik Sanjin Aldobašić, predsjednik komisije.

Izveštaj Komisije za pitanja mladih podnio je vijećnik Kenan Alispahić, predsjednik komisije.

U raspravi su učestvovali vijećnici: Kenan Uzunović, Mirza Husetić, Elvir Purić, Sanjin Aldobašić, Aida Halać, Vernes Menzilović, Osman Mehinagić, Malik Ejubović, Faruk Hodžić, Ibrahim Šišić, Kenan Alispahić, Ekrem Tuka, Namir Škaljo, Mahdi Alić, Nermin Mehić i Almir Babajić, predsjedavajući Vijeća.

U raspravi su učestvovali Gradonačelnik, Fatima Vojvodić, pomoćnica Gradonačelnika za finansije i Mirsad Heleg, savjetnik Gradonačelnika, dajući određena pojašnjenja.

Po zaključenju rasprave vijećnici su se najprije izjasnili o Nacrtu Budžeta Grada Zenica za 2021. godinu sa obrazloženjem i isti usvojili sa 25 glasova „ZA“, bez glasova „PROTIV“ i bez glasova „UZDRŽAN“, a zatim o Nacrtu Odluke o izvršavanju Budžeta Grada Zenica za 2021. godinu sa obrazloženjem i isti usvojili sa 25 glasova „ZA“, bez glasova „PROTIV“ i bez glasova „UZDRŽAN“.

Na prijedlog Kluba vijećnika Zenička inicijativa – Fuad Kasumović predsjedavajući Vijeća je u 14.03 sati saopštio pauzu u trajanju 40 min. i najavio nastavak sjednice u 14.45 sati. Sjednica je nastavila s radom u 15.06 sati.

Nakon pauze, prije prelaska na tačku 4. vijećnik Sanjin Aldobašić javio se za riječ i upozorio na problem pokrenutog klizišta u naselju Rujev do, apelujući na resorne službe da se usaglase po pitanju nadležnosti. Sabira Helvida, pomoćnica Gradonačelnika za ekologiju, komunalne i inspeksijske poslove i Almir Sarajlić, šef Službe civilne zaštite usmeno su odgovorili na izlaganje vijećnika Sanjina Aldobašića i dali pojašnjenja, nakon čega je sjednica nastavila s radom po tačkama dnevnog reda.

TAČKA ČETVRTA

a) Izvještaj o realizaciji utroška sredstava Fonda za ekologiju za 2020. godinu

b) Program utroška sredstava iz Fonda za ekologiju za 2021. godinu

Nije bilo potrebe za uvodnim napomenama.

Izvještaj Komisije za prostorno planiranje i ekologiju podnio je vijećnik Nermin Mehić, predsjednik Komisije.

U raspravi su učestvovali vijećnici: Almir Babajić, Faruk Hodžić i Kenan Alispahić. Na pitanja vijećnika učesnika u raspravi odgovorila je Sabira Helvida, pomoćnica Gradonačelnika za ekologiju, komunalne i inspeksijske poslove.

Po zaključenju rasprave vijećnici su se najprije izjasnili o Izvještaju o realizaciji utroška sredstava Fonda za ekologiju za 2020. godinu i isti usvojili sa 25 glasova „ZA“, bez glasova „PROTIV“ i bez glasova „UZDRŽAN“, a zatim o Programu utroška sredstava iz Fonda za ekologiju za 2021. godinu sa obrazloženjem i isti usvojili sa 25 glasova „ZA“, bez glasova „PROTIV“ i bez glasova „UZDRŽAN“.

TAČKA PETA

a) Prijedlog Rješenja o promjeni oblika i površine parcele u Poslovnoj zoni Zenica I

b) Prijedlog Odluke o raspisivanju javnog konkursa i prodaji gradskog građevinskog zemljišta u Poslovnoj zoni Zenica I

Nije bilo potrebe za uvodnim napomenama.

Za diskusiju se javio vijećnik Kenan Uzunović i predložio sljedeće: 1. da se investitoru ostavi rok od 2 ili 3 godine za izgradnju objekta i 2. da se početna cijena zemljišta poveća sa 50 KM/m² na 70 KM/m². U diskusiji su učestvovali Gradonačelnik i Emir Delić, pomoćnik gradonačelnika za imovinsko-pravne, geodetske poslove i katastar nekretnina dajući pojašnjenja. Gradonačelnik je prihvatio prijedlog za povećanje cijene. U svom izlaganju naročito je naglasio važnost ugradnje zaštitnih klauzula za slučaj da investitor u roku od 2-2,5 godine ne izgradi objekat, odnosno isti ne privede namjeni. Predsjedavajući Vijeća je u 15.38 saopštio pauzu radi usaglašavanja prijedloga, pa je sjednica nastavljena u 15.51 sati.

Nakon pauze na zahtjev predsjedavajućeg Vijeća vijećnici su se izjasnili o Prijedlogu Rješenja o promjeni oblika i površine parcele u Poslovnoj zoni Zenica I i isti usvojili sa 20 glasova „ZA“, bez glasova „PROTIV“ i bez glasova „UZDRŽAN“, a zatim je nakon formulisanja predsjedavajući Vijeća pročitao dva dodatna člana u članu 5. Odluke:

Član 5.a

Obavezuje se investitor koji kupi parcelu na licitaciji da najkasnije godinu dana od dana zaključenja ugovora podnese zahtjev nadležnoj službi za izdavanje urbanističke saglasnosti, a zatim u zakonskim rokovima pribavi građevinsku dozvolu.

Nepoštivanje roka iz stava (1) ovog člana od strane investitora može biti razlog raskida ugovora putem suda.

Objekat se mora izgraditi najkasnije u roku od 3 godine do ispunjenja planske namjene u svrhu koje je izvršena prodaja.

Član 5.b

Zadužuje se nadležna komisija za provođenje javne prodaje da se u tekstu javnog konkursa ugradi zaštitna klauzula „prava preče kupovine“ predmetnih parcela iz ove odluke u korist Grada Zenica po istoj prodajnoj cijeni koja se ostvari u postupku javne licitacije, bez obaveze na strani Grada da investitoru nadoknadi troškove koji nastanu u postupku zaključenja ugovora i prilikom kupovine i raskida ugovora, kao i trošak plaćenog poreza na promet nekretnina.

Na traženje predsjedavajućeg Vijeća vijećnici su se izjasnili o Prijedlogu Odluke o raspisivanju javnog konkursa i prodaji gradskog građevinskog zemljišta u Poslovnoj zoni Zenica I s predloženom dopunom i isti usvojili sa 20 glasova „ZA“, bez glasova „PROTIV“ i bez glasova „UZDRŽAN“.

TAKKA ŠESTA

- Prijedlog Rješenja o imenovanju drugostepene komisije za rješavanje po žalbi protiv rješenja u prvostepenom upravnom postupku

Nije bilo potrebe za uvodnim napomenama.

U raspravi niko nije učestvovao.

Vijećnik Kenan Uzunović, predsjednik Komisije za izbor i imenovanja podnio je izvještaj iste komisije. Komisija je imala primjedbu da rješenje ne sadrži član kojim se reguliše visina naknade za rad članova drugostepene komisije. Gradonačelnik je pojasnio da naknada nije predviđena jer se radi o poslovima koji se obavljaju u radnom vremenu.

Na traženje predsjedavajućeg Vijeća vijećnici su se izjasnili o Prijedlogu Rješenja o imenovanju drugostepene komisije za rješavanje po žalbi protiv rješenja u prvostepenom upravnom postupku i isti usvojili sa 20 glasova „ZA“, bez glasova „PROTIV“ i bez glasova „UZDRŽAN“.

TAKKA SEDMA

- Prijedlog Zaključka o dostavljanju Programa rada Gradonačelnika za mandatni period 2020.-2024. godine

Nije bilo potrebe za uvodnim napomenama.

Gradonačelnik se saglasio s predloženim rokom od 30 dana za dostavu Programa.

Na traženje predsjedavajućeg Vijeća vijećnici su se izjasnili o Prijedlogu Zaključka o dostavljanju Programa rada Gradonačelnika za mandatni period 2020.-2024. godine i isti usvojili sa 20 glasova „ZA“, bez glasova „PROTIV“ i bez glasova „UZDRŽAN“.

Sjednica je zaključena i završila s radom u 16.00 sati.

Sastavni dio ovog zapisnika je audiozapis, pohranjen u Stručnoj službi Gradskog vijeća na osnovu kojeg se može ostvariti uvid u diskusije sa sjednice Vijeća.

PREDSJEDAVAJUĆI
GRADSKOG VIJEĆA ZENICA
Almir Babajić